

22 OCT 1996

Mahathir - Kagum

CENDEKIAWAN CHINA KAGUMI MAHATHIR

KANGAR, 22 Okt (Bernama) -- Para cendekiawan China yang kini dalam rangka lawatan selama sepuluh hari ke negara ini melahirkan kekaguman mereka terhadap pentadbiran Perdana Menteri, Datuk Seri Dr Mahathir Mohamad.

Mereka yang terdiri daripada lima pegawai kanan Persatuan Persahabatan Rakyat China dengan Negara Luar (CPAFFC) menyifatkan Dr Mahathir sebagai seorang pemimpin yang berkebolehan serta cekap.

Ketua Hal Ehwal Asia dan Afrika CPAFFC, Wang Yunze yang mengetuai delegasi itu berkata rakyat negara ini sudah pasti bersyukur mempunyai pemimpin seperti Dr Mahathir.

Wang yang hari ini berada di Perlis kerana menjadi tetamu Majlis Kebudayaan Negeri Perlis (MKNPs) dan Persatuan Penulis Perlis (3P) turut kagum dengan keindahan alam semulajadi negeri ini.

Mereka yang kali pertama berada di negara ini berharap pengalaman sepanjang berada di negara ini sejak 18 Oktober lalu akan tetap terpahat dalam ingatan apabila kembali ke tanah air mereka Ahad depan.

Anggota-anggota lain delegasi itu ialah Presiden Persatuan Penulis Wilayah Hebei, Liu Xiafong, Pengarah Am CPAFFC Dong Shimei, Ketua Bahagian Asia Selatan CPAFFC, Cui Yangjiu dan pegawai perhubungan CPAFFC, Cik Li Sanghua.

Ketua Satu Gabungan Penulis Nasional (GAPENA), Tan Sri Prof Ismail Hussein mengiringi delegasi itu yang dibawa melawat Gua Kelam, dan Taman Ular dan Reptilia di Sungai Batu Pahat.

Mereka turut kagum dengan keunikan Gua Kelam, terowong semula jadi sepanjang 370 meter yang terletak berhampiran pekan Kaki Bukit dekat sini, yang disifatkan sebagai salah satu keajaiban dunia.

"Kami belum pernah melihat keindahan gua seumpama ini. Ia sungguh menarik dan mempesonakan," kata Li Sanghua.

Semasa melawat Taman Ular dan Reptilia di Sungai Batu Pahat, mereka berpeluang bermain dengan ular sawa yang dipelihara di taman itu.

Taman itu yang dikendalikan oleh Perbadanan Kemajuan Ekonomi Negeri Perlis (PKENPs) mulai awal tahun ini adalah antara tarikan pelancong di negeri ini. Sebelum ini taman yang menempatkan puluhan spesies ular, buaya dan kura-kura itu dikendalikan oleh Institut Penyelidikan Perubatan (IMR) Kementerian Kesihatan Malaysia. -- BERNAMA

AD OBA